

3JN -

3 Zwan

Batwa nii sagi tə,

Zwan

nə púpúní

Zwan batwa nii sagi tə yuu wa sugu

Lìù tə, v nə púpúní sagi ku tə

Llà zənzən buŋa də, ku yi *tuntunu Zwan nə púpúní ku. Zwan tə, v nə púpúní saga bələ tə duən tə, mə v mù nə púpúní ku tə də. U yà boŋə v tiàn “nəkwia.”

Lìù tə nə, Zwan nə púpúní

Zwan púpúní sagi ku tə, v pa liù don nə, ba nə boŋə Gayisə.

Sagi tə wa sugu

U púpúní ku, v ma bu Gayisə nə, v nə twá Yu cígá tə nə, v ga saŋa *Kərisə là tə nə yiri. Ku kwa nə, v swìn bɛɛ don yoo, ba nə boŋə Diyotərefə. U biri də, bɛɛ təntə wà zəni fwa, v nə wà v sugu tə jon, v ga wà sɛ v pa, Kərisə là tə zuri v diè wa yiri.

Ku mù təntə də kwa nə, v kúù bùà liù don də nə, ba nə boŋə Demetəriyisə. U mù bɛɛ təntə yi ləzwənzəŋu, v ga ya cígá tíú là tə mama yáá con.

Zwan jùnì Gayisə

¹ À mù *nəkwia tə nə púpúní sagi ku tə, à pín n mù Gayisə nə. N yí liù tə, n yoo nə cà à nə zənzən, à ga swə mú də cígá cígá sonu də. ² À nubiswənə tə, à yulori nə ya, sə won mama kwən ku pa mú, sə n yazurə də ya zəni, sə n ga twá Zwezi-*Kərisə nə zəni.

Gayisə zìlí Yu cígá tə nii zəni

(Matia 10.40-42)

³ À pùé poli zənzən, mánjá tə wa, *Kərisə lià duən nə twi nə con, ba swìn n yoo də, nətu tə, n nə yèé Yu cígá tə. Ba biri, nətu n nə zìlí Yu cígá tə nii. ⁴ À ba pupwən don jə ka nə kúbè dwə, à nə nì də, ba swìn də, à bia tə zìlí Yu cígá tə nii. ⁵ À nubiswənə tə, n yí liù tə, n nə fwa zəni lià tə yira, ba nə yí nubia Kərisə yiri, ba nə yí vərə tətə. Ku nətu biri də, n twá *Yuu-Tiu nə də pùé nədu. ⁶ Ba swìn n sonu tə yoo, ba biri Kərisə lià púlí tə yáá con. À lòrì mú, sə n san ba, sə ba wàní ba kèñ, ba va ba cwəŋə tə. Fwa nətu, sə ku pa dun Yu nə. ⁷ Ku ya ba nan, sə ba swìn Yuu-Tiu yiri tə yoo ba biri. Yá ba ga wà won mama jon lià tə con, ba nə yəri Zwezi-Kərisə. ⁸ Nə mù Kərisə lià tə dàń nə mɛ, sə nə san ba mù lià təntə nə, sə ku pa, nə mù də ba mù mɛ ya tètònà Yu cígá tə yiri.

Diyotərəfə də Demetəriyisə yoo

(Likə 20.46-47, 1 Korəntə tián 4.18-21, 1 Piyerə 2.12)

⁹ À púpúní sagi kukuə, à pa *Kərisə lià púlí tə nə. Yá Diyotərəfə, v nə swə, sə v ya ba yáá tíú tə, viga, sə v zìlí nə nii. ¹⁰ Ku mù nə pín, mánjá tə wa, à nə wá bà, à wá líí aba tutunkukwɪnan tə, v nə tuŋa. À wá líí aba sùràn tə, də kunkun tə də, v nə kunɪ v kəni nə nii nə. Yá də v nə fwa nətu tə mama, ku tə wà v fira yí. Ku mù nə pín, v dàń vɪ, sə v jon lià tə duən tə, ba nə yí nubia Kərisə yiri, ba nə twi á con, v kə v diè wa. Nubia tə duən nə pià ba

jon ba, ba kə ba diè wa, v yàá caga ba nii nə. Yá v ga dɪŋɪ ba mù lià təntə, ba nə pià ba jon ba, v lɪ Kərisə lià púlí tə wa.

¹¹ À nubiswənə, n mù dân ká twá n kwè yolwan fàŋú. N mɛ, sə n kwè, ku tə nə ziən fàŋú. Liù tə, v nə fwa zəni, v ya Yu nə tɪ wá. Yá liù tə, v nə fwa yolwan, v yəri Yu tətə.

¹² Ba mama swìn Demetəriyisə zəni tə yoo. Yá Yu cígá tə də tətə bɪɾɪ v zəni tə. Nə də swìn v zəni tə yoo nə bɪɾɪ. Yá ku tə, nə nə swìn tə yɪ cígá.

Sagɪ tə yígúré sùràn

¹³ À jə yìèn zənzən, à nə pià, sə à swìn n con. Yá à ga ba pià, sə à púpúní tə sagɪ wa də púpúná mua. ¹⁴ À buŋa də, à wá na mú síún, sə nə swìn duən con də níó.

¹⁵ Yu nə wá pa mú bɪcən sìé. N dabara tə də jùnì mú. Vəli nə dabara tə liù mama con, n jon wá n pa nəba.